

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-286/20
Sarajevo, 27.2.2020. godine

Z A P I S N I K
**5. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 13. i 27. 2. 2020. godine**

Sjednica je počela sa radom u 11.25.

Sjednicom je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio delegate, predstavnike Vlade Federacije Bosne i Hercegovine te predstavnike medija.
Izostanak sa sjednice je opravdala Mirela Trepanić.

Prema evidenciji Stručne službe, sjednici prisustvuje 52 delegata što čini većinu pa Dom naroda može raditi i punovažno odlučivati.

Potom se prešlo na glasanje o zapisnicima.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH bez primjedbi, sa 49 glasova za i jednim suzdržanim glasom usvojio Zapisnik 4. sjednice Doma naroda Parlamenta FBiH održane 19.12. 2019. i 23.1. 2020. godine.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH bez primjedbi, sa 47 glasova za usvojio Zapisnik 3. vanredne sjednice Doma naroda Parlamenta FBiH održane 19.12. 2019. godine.

Potom je predsjedavajući podsjetio delegate da na osnovu člana 104. Poslovnika o radu Doma naroda Parlamenta Federacije Bosne i Hercegovine ukoliko žele mogu postavljati delegatska pitanja ili pokretati inicijative.

Delegatska pitanja i inicijative

Rasim Kantarević je pitao premijera Vlade FBiH zašto se ne poduzimaju adekvatne mjere protiv odgovornih, onih koji ne provode ove mjere, te ako se ne provode presude Ustavnog suda kako i na koji način obezbijediti jednakost pred zakonom i poštivanje ustavne odredbe.

Boris Krešić je postavio tri pitanja.

Prvo pitanje je upućeno Federalnom ministarstvu zdravstva u vezi presude Ustavnog suda U-61/17, odnosno pitanje da li je Federalno ministarstvo zdravstva uputilo akt svim kantonalnim ministarstvima zdravstva da se, u skladu sa navedenom presudom,

djetetom smatra svaka osoba od rođenja do punoljetstva kao da su mu pružena ista prava iz zdravstvenog osiguranja i zdravstvene zaštite kao zdravstveno osiguranoj djeci bez obzira na njihov status i činjenicu da li su učenici osnovnih škola.

Drugo pitanje je upućeno Federalnom ministarstvu pravde FBiH u vezi presude Ustavnog suda U-22/16, a ono glasi: Koja se forma ugovora zahtjeva za promet nekretnina te na koji način uknjižiti pravo vlasništva u zemljišnim knjigama uzimajući u obzir članove 3. i 42. Zakona o zemljišnim knjigama Federacije BiH?

Treće pitanje upućeno je Federalnom ministarstvu finansija: Šta je, prema Zakonu o porezu na dohodak, u smislu stava 5. člana 24. istog zakona, dokaz o izdržavanju djeteta čiji roditelji nisu u braku i kojima presudom suda nije određeno plaćanje alimentacije?

Damir Marjanović je postavio dva pitanja i pokrenuo jednu inicijativu.

Prvo pitanje je upućeno svim vladama FBiH - Na osnovu kojeg zakona i legislative je sada reguliran naučnoistraživački rad u FBiH? U vezi sa ovim pitanjem pokrenuo je i inicijativu prema Vladi FBiH da po hitnom postupku izradi Zakon o naučnoistraživačkoj djelatnosti u FBiH.

Drugo pitanje upućeno je predsjedavajućem Doma naroda, a ono glasi: Kada će se na sjednici Doma naroda razmatrati Prijedlog Zakona o zaštiti okoliša?

Dževad Hadžić je postavio dva pitanja.

Prvo pitanje postavljeno je Federalnom ministarstvu zdravlja, a glasi: U koliko je univerzitetskih kliničkih centara Federacija preuzela osnivačko pravo, te koje su to zdravstvene ustanove kao i zašto ne konzumira pravo u nekoj zdravstvenoj ustanovi u kojoj je preuzela to osnivačko pravo?

Drugo pitanje je postavljeno Federalnom ministarstvu za izbjegla i raseljena lica - Koliko je ovo ministarstvo u zadnjem mandatnom periodu uložilo sredstava na ime povratka, tražim da se ta sredstva prikažu po strukturi u smislu općina u koje su uložena, da se prikažu po strukturi u smislu projekata koji su bili infrastrukturne prirode, te koliko je uloženo na povratke održivog povratka?

Ivan Ivić postavio je pitanje nadležnoj carinskoj službi BiH - Zašto nije isto postupanje o svim carinskim upravama odnosno carinskim ispostavama pri carini izvoza drvene građe, zašto carinske ispostave koje pripadaju Upravi Mostar za podnošenje zahtjeva za carinjenje izvoza drvene građe uvjetuju podnošenjem takozvanog uvjerenja o kratkoći dok druge carinske službe to ne traže?

Zdenka Džambas je postavila dva pitanja.

Prvo pitanje se odnosi na dostavljanje spiska svih institucija koje kontrolira FBiH, direkcija, agencija i ostalo, ko su njihovi direktori, ko su njihovi rukovodeći državni službenici, koliko ima žena.

Drugo pitanje je upućeno Federalnom ministarstvu turizma i okoliša: Gdje je 10 odlagališta na koja se odlaže radioaktivni materijal na području BiH?

Damir Džeba postavio je pitanje Parlamentu FBiH: Zašto Parlament FBiH, i pored proteka prekluzivnog roka iz Zakona o koncesijama FBiH, nije imenovao komisiju za koncesije Federacije BiH?

Senad Čeljo je postavio pitanje premijeru Vlade FBiH i Federalnom ministarstvu energije, rudarstva i industrije koje glasi: Da li Vlada FBiH planira privatizaciju

većinskog vlasništva udjela kapitala u privrednim subjektima namjenske industrije u FBiH?

Vibor Handžić je pokrenuo inicijativu u vezi projekta „Rekonstrukcija kolektora Bjelašnica - Hadžići“.

Aner Žuljević je postavio tri pitanja i pokrenuo jednu inicijativu.

Prvo pitanje je upućeno Tužilaštvu FBiH: Da li je i koliko puta pokrenut postupak u vezi nepoštivanja Odluke Ustavnog suda Federacije? Od Ustavnog suda Federacije zatražio je i informaciju o broju neimplementiranih presuda.

Drugo pitanje postavio je Vladi FBiH sa zahtjevom da se dostavi pregled javnih preduzeća u kojima Vlada FBiH vrši ovlaštenja u kojima su imenovani vršioци dužnosti, bilo upravnog odbora, nadzornog odbora ili članova uprave, te koliko vremena to traje po pojedinačnom preduzeću.

Treće pitanje je upućeno Agenciji za bankarstvo FBiH: Tražim da mi se dostavi pregled svih pojedinačnih naknada koje se naplaćuju korisnicima usluga u bankama te promjene njihovih pojedinačnih iznosa u zadnje četiri godine? U sklopu ovog pitanja podnosi i inicijativu prema Vladi FBiH za donošenje Zakona o uporedivosti naknada prebacivanja računa za plaćanje i pristupa osnovnom računu.

Segmedina Srna-Bajramović je postavila tri pitanja.

Prvo pitanje je upućeno Poreznoj upravi FBiH i Federalnom zavodu za statistiku i glasi: Tražim da mi se na osnovu podataka iz Jedinственог sistema registracije, kontrole i naplate doprinosa dostavi koliko je od stupanja na snagu novog Zakona o radu prijavljeno zaposlenih na neodređeno, a koliko na određeno, koliko uposlenih nakon 2015. godine imaju neprekidno trajanje uplata doprinosa, bez prekida duže od tri godine?

Zatražila je i da joj se, na osnovu obračuna sredstava u zdravstvu, dostave podaci koliko je u 2017., 2018. i 2019. godini ukupno utrošeno novca u javnim zdravstvenim ustanovama, a koliko su građani zbog nemogućnosti ostvarivanja usluge u javnom zdravstvu uplatili privatnim zdravstvenim ustanovama.

Također, tražila je i pojašnjenje potrebe kupovine objekta za trajni smještaj Fonda za zaštitu okoliša u iznosu od šest miliona KM, dok istovremeno postoje veliki problemi sa aerozagađenjem i drugi problemi iz zaštite okoliša poput deponije Ubolak, Smiljevići, zagađenja rijeka i tome slično.

Ramo Isak je postavio pitanje Ministarstvu unutrašnjih poslova FBiH i tužilaštvu, šta planira uraditi povodom pojave lažnih Facebook profila „saliveni“ i „čaršija Zenica“ koji napadaju, vrijeđaju i omalovažavaju ljude te pozivaju na nacionalnu mržnju.

Mladen Simić je postavio pitanje Poreznoj upravi Federacije koje glasi: „Koliki tačno iznos duguje Javno komunalno preduzeće Zenicatrans prijevoz putnika d.d. Zenica na ime poreznih obaveza, koje su strukture i šta se preduzelo po pitanju naplate istih od dana kada su nastale obaveze pa do danas, odnosno da se objasni i obrazloži postupak prinudne naplate kako za JP Zenicatrans tako i za ostale dužnike, te da li je, u smislu člana 33. Pravilnika o procedurama prisilne naplate poreznih obaveza, prije izdvajanja naloga za plaćanje poreznih obaveza broj: 13-4-01-15-25-1778/19 od 6.2.2020. godine provedena procedura prikupljanja činjenica i dokaza za utvrđivanje solidarne odgovornosti Grada Zenica po pitanju poreznih obaveza, ako jeste, da li je doneseno rješenje kao upravni akt sa mogućnošću pravnog lijeka na isto, a kako to

zakon i navedeni Pravilnik predviđa odnosno je li to isto donio sud ili je Porezna uprava svojim unutrašnjm aktom donijela isto.“

Igor Stojanović je postavio pitanje Federalnom ministarstvu okoliša i turizma kao i Federalnoj upravi za inspekcijske poslove. Pitanje glasi: „Molim za informaciju šta je Federalno ministarstvo okoliša i turizma te Federalna uprava za inspekcijske poslove poduzela po pitanju nadzora nad emisijom industrijskih postrojenja snage preko 50 kilovatsati za koje su okolinske dozvole izdate na federalnom nivou naročito u Kantonu Sarajevo kao području koje je imalo i najgore rezultate mjerenja kvaliteta zraka i šta se desilo sa zahtjevom Kantonalnog ministarstva prostornog uređenja, građenja i zaštite okoliša za inspekcijske nadzore Kantona Sarajevo, dakle, da li se udovoljilo zahtjevu i da li je poduzeta bilo kakva aktivnost?“

Hadis Jusić je postavio pitanje Ministarstvu sigurnosti BiH koje glasi: „Da li Ministarstvo finansija ima podatak koliko je tih sredstava povučeno iz međunarodnih fondova koji djeluju na području Krajine povodom migrantske krize, te da li je zapostavljena sigurnosna komponenta tog problema budući da prevladava humanitarna komponenta?“

Nakon postavljenih delegatskih pitanja i inicijativa, prešlo se na utvrđivanje dnevnog reda.

Predsjedavajući je obavijestio delegate da Kolegij Doma naroda Parlamenta FBiH predlaže da se u dnevni red 5. sjednice uvrsti Prijedlog zakona o izmjenama i dopunama Zakona o porezu na dobit s prijedlogom da se isti razmatra po hitnom postupku.

Prijedlog zakona o izmjenama i dopunama Zakona o porezu na dobit je po hitnom postupku usvojio Predstavnički dom Parlamenta Federacije BiH na 7. vanrednoj sjednici održanoj 29.1.2020. godine.

Na osnovu rezultata glasanja, predsjedavajući je konstatovao da Dom naroda Parlamenta Federacije BiH nije prihvatio ovaj prijedlog, jer prijedlog nije dobio potrebnu većinu glasova delegata.

Predsjednik Kluba hrvatskih delegata Ivo Tadić je izrazio sumnju u rezultate glasanja te zatražio pojedinačno glasanje.

Sekretar Doma naroda Izmir Hadžiavdzić izvršio je poimenično izjašnjavanje.

Na osnovu rezultata poimeničnog izjašnjavanja, predsjedavajući je konstatovao da je Dom naroda Parlamenta FBiH sa 35 glasova za, pet suzdržanih glasova i 12 glasova protiv, prihvatio da se u dnevni red današnje sjednice uvrsti Prijedlog zakona o izmjenama i dopunama Zakona o porezu na dobit.

Kolegij Doma naroda predložio je da se u današnji dnevni red, kao posljednja tačka, uvrsti Izbor i imenovanja.

Na osnovu rezultata glasanja konstatovano je da je Dom naroda sa 31 glasom za, 5 suzdržanih glasova i 5 glasova protiv, prihvatio prijedlog Kolegija da se u današnji dnevni red uvrsti kao posljednja tačka: Izbor i imenovanje.

Na osnovu rezultata glasanja, predsjedavajući je konstatovao da je Dom naroda Parlamenta FBiH sa 37 glasova za, četiri suzdržana glasa i pet glasova protiv,

prihvatio da se Prijedlog Zakona o visini stope zatezne kamate razmatra po hitnom postupku.

Na osnovu rezultata glasanja, predsjedavajući je konstatovao da je Dom naroda Parlamenta FBiH sa 36 glasova za, tri suzdržana glasa i osam glasova protiv, prihvatio da se Prijedlog Zakona o izmjenama i dopunama Zakona o porezu na dobit razmatra po hitnom postupku.

Zatim je predsjedavajući stavio na glasanje predloženi dnevni red i na osnovu rezultata glasanja, konstatovao da je Dom naroda Parlamenta Federacije Bosne i Hercegovine sa 39 glasova za i 10 suzdržanih glasova usvojio sljedeći

DNEVNI RED

1. Prijedlozi zaključaka koji proizlaze iz presuda Ustavnog suda Federacije Bosne i Hercegovine i Ustavnog suda Bosne i Hercegovine broj: U-6/19 od 4.10.2019. godine, U-25/19 od 3.12.2019. godine, U-27/19 od 3.12.2019. godine, U-28/19 od 3.12.2019. godine, U-36/18 od 12.11.2019. godine,
2. Prijedlog odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine,
3. Prijedlog zakona o visini stope zatezne kamate - hitni postupak,
4. Prijedlog zakona o izmjenama i dopunama Zakona o porezu na dobit - hitni postupak,
5. Prijedlog zakona o obrtu i srodnim djelatnostima u Federaciji Bosne i Hercegovine,
6. Nacrt zakona o elektronskom potpisu,
7. Nacrt zakona o izmjenama i dopunama Zakona o privrednim društvima,
8. Nacrt zakona o podršci porodicama sa djecom u Federaciji Bosne i Hercegovine,
9. Nacrt zakona o reprezentativnosti sindikata i udruženja poslodavaca,
10. Izvještaj o odobravanju izdvajanja sredstava iz Tekuće rezerve Vlade Federacije Bosne i Hercegovine za 2019. godinu za period 1.1.2019.-1.6.2019. godine sa:
 - a) tabelarnim pregledom odluka o odobravanju sredstava iz „Tekuće rezerve Vlade Federacije BiH“ Budžeta Federacije Bosne i Hercegovine za 2019. godinu za period 1.1.2019. - 30.6.2019. godine,
 - b) tabelarnim pregledom rješenja o izdvajanju sredstava iz „Tekuće rezerve premijera i zamjenika premijera“ Budžetu Federacije Bosne i Hercegovine za 2019. godinu za period 1.1.2019. - 30.6.2019. godine
 - c) tabelarnim pregledom odluka o izdvajanju sredstava iz „Tekuće rezerve Vlade Federacije BiH“ Budžeta Federacije Bosne i Hercegovine za 2019. godinu za period 1.1.2019.-30.6.2019. godine po budžetskim korisnicima,
11. Izvještaj o poslovanju BH Gas d.o.o. Sarajevo za 2017. godinu i Izvještaj o poslovanju BH Gas d.o.o. Sarajevo za 2018. godinu,
12. Godišnji izvještaj o poslovanju JP Ceste Federacije BiH d.o.o. Sarajevo za 2018. godinu,

13. Godišnji izvještaj Visokog sudskog i tužilačkog vijeća Bosne i Hercegovine za 2018. godinu,
14. Izbori i imenovanja.

1. Prijedlozi zaključaka koji proizlaze iz presuda Ustavnog suda Federacije Bosne i Hercegovine i Ustavnog suda Bosne i Hercegovine broj: U-6/19 od 4.10.2019. godine, U-25/19 od 3.12.2019. godine, U-27/19 od 3.12.2019. godine, U-28/19 od 3.12.2019. godine, U-36/18 od 12.11.2019. godine

Parlamentu Federacije BiH su od strane Ustavnog suda Federacije BiH dostavljene presude: U-25/19, U-27/19, U-28/19 i U-36/18. Ove presude su također dostavljene i nadležnim radnim tijelima koja su iste razmatrala.

Izvršenje presude broj U-25/19 od 3.12.2019. godine odnosi se na Prijedlog zakona o izmjeni Zakona o matičnim knjigama koji se nalazi u parlamentarnoj proceduri.

Presuda broj U-6/19 od 4.10.2019. godine odnosi se na Zakon o visini stope zatezne kamate, a kako se isti nalazi pod tačkom dva dnevnog reda usvajanjem istog bi bila provedena ova presuda suda.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta FBiH sa 46 glasova za i dva suzdržana glasa usvojio sljedeći

ZAKLJUČAK

Zadužuje se premijer Federacije BiH da u skladu sa Ustavom Federacije BiH osigura izvršenje presuda Ustavnog suda Federacije broj: U-25/19 od 3.12.2019. godine i U-6/19 od 4.10.2019. godine.

2. Prijedlog odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine

Prijedlog Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine utvrdili su predsjedavajući i potpredsjedavajući Doma naroda.

Prijedlog zakona su razmatrala nadležna radna tijela i dostavila svoje izvještaje.

Potpredsjedavajući Aljoša Čampara je obrazložio Prijedlog odluke.

Ispred Komisije za izbor i imenovanje govorio je Ivo Tadić.

U raspravi su učestvovali: Igor Stojanović, Ivo Tadić, Goran Broćeta, Slađan Ilić, Jasmin Duvnjak, Aljoša Čampara, Aner Žuljević, Damir Džeba i Zvonko Marić.

Usljedila je pauza u trajanju od 30 minuta.

Na osnovu rezultata glasanja predsjedavajući je konstatovao da je Dom naroda Parlamenta Federacije Bosne i Hercegovine jednoglasno sa 46 glasova donio Odluku o izboru predsjednika, zamjenika predsjednik i članova radnih tijela Doma naroda Parlamenta Federacije BiH.

3. Prijedlog Zakona o visini stope zatezne kamate - hitni postupak

Prijedlog Zakona o visini stope zatezne kamate je utvrdila Vlada Federacije.

Predstavnički Dom Parlamenta Federacije Bosne i Hercegovine je na 10. sjednici održanoj 29.01.2020. godine usvojio Prijedlog Zakona o visini stope zatezne kamate u tekstu kako ga je predložila Vlada Federacije BiH.

Prijedlog Zakona o visini stope zatezne kamate je obrazložila predstavnica Federalnog ministarstva finansija Mira Bradara.

Na Prijedlog zakona Vibor Handžić je podnio Amandman koji se odnosi na član 3. stav 2. Prijedloga zakona.

Vlada Federacije je dostavila Izjašnjenje kojim ne prihvata Amandman.

Prijedlog zakona su razmatrala nadležna radna tijela i dostavila svoje izvještaje.

U raspravi su učestvovali : Žarko Vujović, Damir Marjanović, Vibor Handžić i Ivo Tadić.

Vibor Handžić je izjavio da odustaje od Amandmana.

Na osnovu rezultata glasanja predsjedavajući je konstatovao da je Dom naroda Parlamenta Federacije Bosne i Hercegovine sa 33 glasa za, osam suzdržanih glasova i dva glasa protiv usvojio Prijedlog Zakona o visini stope zatezne kamate.

4. Prijedlog zakona o izmjenama i dopunama Zakona o porezu na dobit - hitni postupak

Prijedlog zakona o izmjenama i dopunama Zakona o porezu na dobit je utvrdila Vlada Federacije BiH.

Predstavnički Dom Parlamenta Federacije Bosne i Hercegovine je na 7. vanrednoj sjednici održanoj 29.01.2020. godine usvojio Prijedlog zakona o izmjenama i dopunama Zakona o porezu na dobit u tekstu kako ga je predložila Vlada Federacije BiH.

Prjedlog Zakona su razmatrala nadležna radna tijela i dostavila svoje izvještaje.

Na Prijedlog zakona Amandman je podnio delegat Ramo Isak.

Vlada Federacije je dostavila izjašnjenje kojim je prihvatila Amandman.

Prijedlog Zakona je obrazložila predstavnica Vlade Medina Dudo.

U raspravi su učestvovali : Damir Marjanović, Aner Žuljević i Medina Dudo.

Na osnovu rezultata glasanja predsjedavajući je konstatovao da je Dom naroda Parlamenta Federacije Bosne i Hercegovine sa 43 glasa za, i jednim suzdržanim glasom usvojio Prijedlog zakona o izmjenama i dopunama Zakona o porezu na dobit sa sljedećim Amandmanom:

U članu 3. u stavu 2. Prijedloga zakona o izmjenama i dopunama Zakona o porezu na dobit, riječi: „po stopama iz stava 2. ovoga člana“ se brišu, a iza riječi: „amortizuje“ dodaju se riječi: „kod najmoprimca“.

Prema tome, potrebno je da se Predstavnički dom izjasni o ovome Amandmanu.

5. Prijedlog Zakona o obrtu i srodnim djelatnostima u Federaciji Bosne i Hercegovine

Prijedlog Zakona o obrtu i srodnim djelatnostima je utvrdila Vlada Federacije BiH.

Predstavnički Dom Parlamenta Federacije Bosne i Hercegovine je na 4. sjednici održanoj 10. i 11. 9. 2019. godine usvojio Prijedlog Zakona o obrtu i srodnim djelatnostima u Federaciji Bosne i Hercegovine u tekstu kako ga je predložila Vlada Federacije BiH.

Prijedlog Zakona su razmatrala nadležna radna tijela i dostavila svoje izvještaje.

Na Prijedlog zakona sedam amandmana je podnio Aner Žuljević.

Vlada Federacije je dostavila izjašnjenje kojim ne prihvata amandmane.

Prijedlog Zakona je obrazložio predstavnik Vlade Amir Zukić.

U raspravi je učestvovao Igor Stojanović.

Tomislav Martinović je pozvao predstavnika Obrtničke komore FBiH Željka Babića da se obrati Domu naroda.

Usljediła je pauza, nakon čega je došlo do prekida sjednice.

Sjednica je prekinuta u 16.45 sati.

NASTAVAK SJEDNICE OD 27.2. 2020. GODINE

Sjednica je počela u 13:24 sati.

Sjednicom je predsjedavao predsjedavajući Doma naroda Parlamenta FBiH Tomislav Martinović.

Na osnovu evidencije Stručne službe Doma naroda predsjedavajući je konstatovao da sjedinici prisustvuje 44 delegata, što čini većinu pa Dom naroda može raditi i punovažno odlučivati.

Izostanak sa sjednice su opravdali: Drago Puzigaća, Sandra Imširović, Senad Alić, Mirela Trepanić, Senad Ahmetović, Ilija Nakić, Damir Džeba, Mladen Lonić, Slađan Ilić i Goran Broćeta.

Predsjedavajući je obavijestio delegate da su, između dva nastavka ove sjednice, vođene rasprave i diskusije sa obrtničkom komorom i resornim ministarstvom vezane za Prijedlog zakona o obrtu i srodnim djelatnostima Federacije BiH i da će Vlada Federacije dostaviti određene akte vezane za tačku i predložio da se pređe na sljedeće tačke, što su delegati prihvatili.

6. Nacrt zakona o elektronskom potpisu Federacije BiH

Nacrt zakona o elektronskom potpisu Federacije BiH je utvrdila Vlada Federacije BiH.

Predstavnički dom Parlamenta Federacije Bosne i Hercegovine je na 30. vanrednoj sjednici održanoj 20.06.2018. godine razmatrao je i zaključkom prihvatio Nacrt zakona o elektronskom potpisu Federacije BiH.

Nacrt ovog zakona su razmatrala nadležna radna tijela i dostavila svoje izvještaje.

Nacrt zakona je obrazložio predstavnik Federalnog ministarstva prometa i komunikacija Kenan Osmanagić.

U raspravi su učestvovali Aner Žuljević, Tomislav Martinović i Kenan Osmanagić.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH je sa 41 glasom za i dva suzdržana glasa, usvojio sljedeći

ZAKLJUČAK

1. Dom naroda Parlamenta Federacije BiH prihvaća Nacrt zakona o elektronskom potpisu Federacije BiH i smatra da može poslužiti kao osnova za izradu prijedloga zakona.
2. Zadužuje se Vlada FBiH da prilikom izrade prijedloga zakona ima u vidu primjedbe, prijedloge i sugestije koje su iznesene i dostavljene do izrade prijedloga zakona.

7. Nacrt zakona o izmjenama i dopunama Zakona o privrednim društvima

Nacrt zakona utvrdila je Vlada Federacije BiH.

Predstavnički dom Parlamenta Federacije Bosne i Hercegovine je na 30. vanrednoj sjednici održanoj 20.06.2018. godine razmatrao i zaključkom prihvatio Nacrt zakona o izmjenama i dopunama Zakona o privrednim društvima.

Nacrt ovog zakona su razmatrala nadležna radna tijela i dostavila svoje izvještaje.

Nacrt zakona je obrazložila predstavnica Federalnog ministarstva energije, rudarstva i industrije Jasmina Pašić.

U raspravi nije niko učestvovao.

Na osnovu rezultata glasanja predsjedavajući je konstatovao da je Dom naroda Parlamenta Federacije BiH sa 39 glasova za i uz dva suzdržana glasa, usvojio sljedeći

ZAKLJUČAK

1. Dom naroda Parlamenta Federacije BiH prihvaća Nacrt zakona o izmjenama i dopunama Zakona o privrednim društvima i smatra da može poslužiti kao osnova za izradu prijedloga zakona.
2. Zadužuje se Vlada FBiH da prilikom izrade prijedloga zakona ima u vidu primjedbe, prijedloge i sugestije koje su iznesene i dostavljene do izrade prijedloga zakona.

8. Nacrt zakona o podršci porodicama sa djecom u Federaciji BiH

Nacrt zakona utvrdila je Vlada Federacije BiH.

Predstavnički dom Parlamenta Federacije Bosne i Hercegovine je na 1. redovnoj sjednici održanoj 28.2.2019. godine razmatrao i zaključkom prihvatio Nacrt zakona o podršci porodicama sa djecom u Federaciji BiH.

Nacrt ovog zakona su razmatrala nadležna radna tijela i dostavila svoje izvještaje.

Nacrt zakona je obrazložio predstavnik Vlade FBiH Miroslav Jurešić.

U raspravi su učestvovali: Boris Krešić, Segmedina Srna-Bajramović, Dževad Hadžić, Zdenka Džambas, Zvonko Marić, Aner Žuljević, Senad Čeljo, predsjednik Kluba delegata bošnjačkog naroda Jasmin Duvnjak i Vesko Drljača.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH sa 40 glasova za i uz dva suzdržana glasa usvojio sljedeći

ZAKLJUČAK

1. Dom naroda Parlamenta Federacije BiH prihvata Nacrt zakona o podršci porodicama sa djecom u FBiH i smatra da može poslužiti kao osnova za izradu prijedloga zakona.
2. Zadužuje se Vlada FBiH da organizuje i provede javnu raspravu u trajanju od 90 dana.
3. U skladu s procedurama predviđenim Ustavom Federacije BiH za donošenje Zakona i zajedničkih nadležnosti federalne vlasti i kantona zadužuje se Stručna služba Doma naroda Parlamenta FBiH da ovaj zaključak i Nacrt zakona o podršci porodicama s djecom u FBiH dostavi kantonalnim skupštinama. Pozivaju se kantonalne skupštine da daju mišljenje u roku od 90 dana od dana dostave zaključka.
4. Zadužuje se predlagač da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma naroda FBiH i iznesene u javnoj raspravi.

9. Nacrt zakona o reprezentativnosti Sindikata i udruženja poslodavaca

Nacrt zakona utvrdila je Vlada Federacije BiH.

Predstavnički dom Parlamenta Federacije Bosne i Hercegovine je na 7. redovnoj sjednici održanoj 29.10.2019. godine razmatrao i zaključkom prihvatio Nacrt zakona o reprezentativnosti Sindikata i udruženja poslodavaca.

Nacrt ovog zakona su razmatrala nadležna radna tijela i dostavila svoje izvještaje.

Nacrt zakona je obrazložio federalni ministar Vesko Drljača.

U raspravi su učestvovali: Dževad Hadžić, Zdenka Džambas, Zvonko Marić, Jasmin Duvnjak, Damir Marjanović, Aner Žuljević i Vesko Drljača.

Nakon rasprave se glasalo o Nacrtu zakona.

Na osnovu rezultata glasanja, predsjedavajući je konstatovao da Dom naroda Parlamenta Federacije BiH nije prihvatio Nacrt zakona o reprezentativnosti Sindikata i udruženja poslodavaca, jer je za glasalo 25 glasova, tri delegata su bila suzdržana, a sedam delegata je bilo protiv.

Budući da je izražena sumnja u rezultate glasanja, pristupilo se pojedinačnom glasanju koje je obavio Izmir Hadžiavić, sekretar Doma naroda Parlamenta Federacije BiH.

Na osnovu rezultata pojedinačnog glasanja predsjedavajući je konstatovao da je Dom naroda Parlamenta Federacije BiH sa 30 glasova za, tri suzdržana glasa i devet glasova protiv, usvojio sljedeći:

ZAKLJUČAK

1. Dom naroda Parlamenta Federacije BiH prihvaća Nacrt zakona o reprezentativnosti Sindikata i udruženja poslodavaca i smatra da može poslužiti kao osnova za izradu prijedloga zakona.
2. Zadužuje se Vlada FBiH da organizuje i provede javnu raspravu u trajanju od 60 dana.
3. U skladu s procedurama predviđenim Ustavom Federacije BiH za donošenje Zakona i zajedničkih nadležnosti federalne vlasti i kantona zadužuje se Stručna služba Doma naroda Parlamenta FBiH da ovaj zaključak i Nacrt zakona o reprezentativnosti Sindikata i udruženja poslodavaca dostavi kantonalnim skupštinama.
4. Zadužuje se predlagač da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma naroda FBiH i iznesene u javnoj raspravi.

Prijedlog Zakona o obrtu i srodnim djelatnostima.

Predsjedavajući je podsjetio delegate da je rasprava o ovoj tački završena i da je Vlada Federacije podnijela Amandman na Prijedlog ovog zakona, koji je postao sastavni dio Prijedloga zakona. Amandman se odnosi na član 46. stav 4. Prijedloga zakona.

Delegatima se obratio federalni ministar poduzetništva, razvoja i obrta Amir Zukić i izjavio da je Vlada Federacije podnijela Amandman koji glasi:

„U članu 46. stav (4) mijenja se i glasi:

(4) Članarina iz stava (3) ovog člana, na mjesečnom nivou, se ne može propisati u iznosu većem od 0,50% od osnovice za obračun doprinosa za prethodnu godinu koju objavljuje Federalno ministarstvo finansija.“

Vlada FBiH je odbila amandmane delegata Anera Žuljevića.

Delegat Aner Žuljević je zatražio pojedinačno izglasavanje o svakom amandmanu.

Amandman I:

Dodaje se član koji glasi:

Član 18.

(Obrtnica)

- (1) Za obavljanje obrta, obrtnik mora imati obrtnicu, koja je, u smislu ovog zakona, odobrenje za rad.
- (2) Po upisu u Obrtni registar obrtnička komora kantona (u daljem tekstu: kantonalna komora) na čijem teritoriju se nalazi sjedište obrta obrtniku izdaje obrtnicu.
- (3) Obrtnica se izdaje u dvije veličine od kojih je veću obrtnik dužan izložiti u sjedištu obrta, na vidnom mjestu.
- (4) Izdaju i distribuciju obrtnica kantonalnim komorama, u skladu sa stavom (6) ovog člana, vrši Komora.
- (5) Cijenu obrtnice određuje Skupština Komore i ne može iznositi više od 3% prosječne plate u Federacije Bosne i Hercegovine obračunate u prethodnoj kalendarskoj godini.
- (6) Sadržaj i oblik obrtnice pravilnikom propisuje Ministar.

Na osnovu rezultata glasanja predsjedavajući je konstatovao da je amandman I dobio potrebnu većinu budući da je 30 delegata glasalo za, uz osam suzdržanih glasova i četiri glasa protiv.

Amandman II – predsjedavajući je konstatovao da ovaj amandman nije dobio potrebnu većinu budući da je 27 delegata glasalo za, uz devet suzdržanih glasova i dva glasa protiv.

Amandman III – na osnovu rezultata glasanja predsjedavajući je konstatovao da ni ovaj amandman nije dobio potrebnu većinu jer je 26 delegata glasalo za, uz 13 suzdržanih glasova i dva glasa protiv.

Budući da je delegat Aner Žuljević, koga su podržala dva delegate, izrazio sumnju u rezultate glasanja po amandmanu III, pristupilo se pojedinačnom glasanju koje je obavio sekretar Doma naroda Izmir Hadžić.

Nakon obavljenog pojedinačnog izjašnjavanja predsjedavajući je konstatovao da amandman III nije dobio potrebnu većinu iz razloga što su 22 delegata glasala za uz 40 suzdržanih glasova i jedan glas protiv.

Amandman IV – na osnovu rezultata glasanja predsjedavajući je konstatovao da ni ovaj amandman nije dobio potrebnu većinu. Za je glasalo 17 delegata, 21 delegat je bio suzdržan i jedan je glasao protiv.

Amandman V – na osnovu rezultata glasanja predsjedavajući je konstatovao da ni ovaj amandman nije dobio potrebnu većinu. Za je glasalo 16 delegata, 21 delegat je bio suzdržan i dva su glasala protiv.

Amandman VI – na osnovu rezultata glasanja predsjedavajući je konstatovao da Dom naroda Parlamenta FBiH nije usvojio ovaj amandman budući da je 16 delegata glasalo za uz 23 suzdržana glasa i tri glasa protiv.

Amandman VII – kako je 16 delegata glasalo za uz 22 suzdržana glasa i dva glas protiv, predsjedavajući je konstatovao da ni ovaj amandman nije dobio potrebnu većinu.

Predsjednik Kluba delegata bošnjačkog naroda Jasmin Duvnjak je tražio pauzu od 10 minuta.

Nakon pauze pristupilo se glasanju o prijedlogu ovog zakona, a isti nije dobio potrebnu većinu jer je 27 glasalo za, uz pet suzdržanih glasova i šest glasova protiv.

Jasmin Duvnjak je izrazio sumnju u rezultate glasanja i zahtijevao pojedinačno izjašnjavanje u čemu su ga podržala još dva delegata.

Sekretar Doma naroda Parlamenta FBiH Izmir Hadžić je izvršio pojedinačnu prozivku radi utvrđivanja pojedinačnog glasanja, a predsjedavajući je konstatovao da Dom naroda PFBiH nije usvojio ovaj prijedlog zakona budući da je 29 delegata glasalo za, uz pet suzdržanih glasova i osam glasova protiv.

10. Izvještaj o odobravanju izdvajanja sredstava iz tekuće rezerve Vlade Federacije BiH budžeta za 2019. godinu za period 1.01.2019.-30.06.2019.

Izvještaj je dostavila Vlada Federacije.

Predstavnički Dom Parlamenta Federacije Bosne i Hercegovine je na 8. redovnoj sjednici održanoj 20.11.2019. godine prihvatio Izvještaj o odobravanju izdvajanje sredstava iz tekuće rezerve za 2019. godinu, za period od 1.01.2019. do 30.06.2019.

Delegatima se obratila Jelka Milićević, federalna ministrica finansija.

U raspravi su učestvovali: Aner Žuljević, Damir Marjanović i Jelka Milićević, federalna ministrica finansija.

Na osnovu rezultata glasanja, predsjedavajući je konstatovao da Dom naroda Parlamenta Federacije BiH nije prihvatio Izvještaj o odobravanju izdvajanja sredstava iz tekuće rezerve za 2019. godinu, za period od 1.01.2019. do 30.06.2019. godine, jer je za glasalo 23 delegata, osam delegata je bilo suzdržano a sedam delegata je bilo protiv.

11. Izvještaj o radu i poslovanju BH Gas d.o.o Sarajevo za 2017. Godinu Izvještaj o radu i poslovanju BH Gas d.o.o Sarajevo za 2018. godinu

Izvještaje je Parlamentu Federacije dostavio BH Gas d.o.o Sarajevo.

Predstavnički Dom Parlamenta Federacije Bosne i Hercegovine je na 8.redovnoj sjednici održanoj 20.11.2019. godine prihvatio Izvještaj o radu i poslovanju BH Gas d.o.o Sarajevo za 2017. godinu i Izvještaj o radu i poslovanju BH Gas d.o.o Sarajevo za 2018. godinu.

Izvještaje je obrazložio Jasmin Salkić, predstavnik BH Gas d.o.o Sarajevo.

U raspravi su učestvovali: Zvonko Marić, Damir Marjanović i Aner Žuljević.

Pristupilo se glasanju o Izvještaju o radu i poslovanju BH Gas d.o.o Sarajevo za 2017. godinu i Izvještaju o radu i poslovanju BH Gas d.o.o Sarajevo za 2018. godinu. Na osnovu 25 glasova delegata za, uz tri suzdržana glasa i sedam glasova protiv, predsjedavajući je konstatovao da ovi izvještaji nisu dobili potrebnu većinu.

Delegat Ramo Isak je izrazio sumnju u rezultate glasanja. Sekretar Doma naroda Parlamenta FBiH Izmir Hadžić je izvršio pojedinačnu prozivku.

Na osnovu rezultata glasanja predsjedavajući je konstatovao da sa 28 glasova za, devet suzdržanih i tri glasa protiv Izvještaj o radu i poslovanju BH Gas d.o.o Sarajevo za 2017. i 2018. godinu nisu dobio potrebnu većinu.

Stavljen je na glasanje zaključak kojeg je predložio delegat Zvonko Marić.

Na osnovu rezultata glasanja predsjedavajući je konstatovao da je Dom naroda Parlamenta Federacije BiH sa glasom za , uz pet suzdržanih glasova i dva glasa protiv usvojio sljedeći

Z A K L J U Č A K

Dom naroda Parlamenta Federacije Bosne i Hercegovine zadužuje Vladu Federacije da pruži svu neophodnu potporu „BH Gas“, d.o.o. Sarajevo u procesu razvoja i realiziranja Projekta Južna interkonekcija i da u parlamentarnu proceduru dostavi Nacrt zakona o Južnoj interkonekciji.

12. Godišnji izvještaj o poslovanju JP Ceste Federacije BiH d.o.o Sarajevo za 2018. godinu

Izvještaj je dostavilo JP Ceste Federacije BiH d.o.o Sarajevo.

Predstavnički Dom Parlamenta Federacije Bosne i Hercegovine je na 8. redovnoj sjednici održanoj 20.11.2019. godine usvojio je Godišnji izvještaj o poslovanju JP Ceste Federacije BiH d.o.o Sarajevo za 2018. godinu.

U raspravi nije niko učestvovao.

Na osnovu rezultata glasanja sa 27 glasova za i pet suzdržanih glasova, ovaj izvještaj nije dobio potrebnu većinu.

Za riječ se javio predsjednik Kluba delegata hrvatskog naroda Ivo Tadić izrazivši sumnju u rezultate glasanja te je zahtjevao da se pristupi pojedinačnom glasanju.

Sekretar Doma naroda Parlamenta FBiH Izmir Hadžić je izvršio pojedinačnu prozivku. Na osnovu rezultata poimeničnog glasanja ustanovljeno je da je ovaj izvještaj dobio potrebnu većinu sa 33 glasa za, sedam suzdržanih glasova i bez glasova protiv.

13. Godišnji izvještaj Visokog sudskog i tužilačkog vijeća za BiH za 2018. godinu

Izvještaj je dostavilo Visoko sudsko i tužilačko vijeće BiH.

Predstavnički dom Parlamenta Federacije Bosne i Hercegovine je na 8. redovnoj sjednici održanoj 20.11.2019. godine primio k znanju godišnji izvještaj Visokog sudskog i tužilačkog vijeća za BiH za 2018. godinu, a tom prilikom usvojen je i zaključak.

Izvještaj je obrazložio Slavo Lakić, predstavnik Visokog sudskog i tužilačkog vijeća BiH.

U raspravi je učestvovao Aner Žuljević.

Kako se radi o materijalu koji je dostavljen radi informisanja predsjedavajući je konstatovao da je Dom naroda Parlamenta Federacije BiH godišnji izvještaj Visokog sudskog i tužilačkog vijeća za BiH za 2018. godinu primio k znanju.

14. Izbor i imenovanja

Za ovu tačku dnevnog reda nije bilo predloženih materijala.

Sjednica je završila sa radom u 17:36 sati.

* * *

Transkript sjednice čini sastavni dio Zapisnika.

SEKRETAR

Izmir Hadžić

PREDSJEDAVAJUĆI

Tomislav Martinović